

A Monthly Christian Magazine

AN ORGAN OF THE ZOU PRESBYTERIAN CHURCH SYNOD



Khristian Tangkou

Vol. 52 || No. 11

November, 2016

SANGAIKOT PRESBYTERIAN CHURCH BUILDING



Editor: Rev. Tualzachin

Synod Office Telephone No. (03874) 235105

Editorial

KUM leh hate hing kiheng lamdang zel in mu ding leh tang dinga Klam-etna bangma i neilou lai un November ha tan Pasian hoina leh mapuina zal a hing vengbittu Mangpa min loup i phat kawm in Ama thupina ipie uhi. Pasian hoinate a mal mal in eima hinkhuo ah simlei sim senglou ahi. Hinanleh Ama siemsa mihingten Mangpa hoina theiphalou in i um ua, sil zousie eima bawl thei dan in i ngaisun khazel uhi. I laisengthou (Sam No. 116: 12-13)) Mangpa hoina khu bang chin ka thuh thei tadiei? Nuomthu tutna sielpieh hing pevang in na kung ah thu ngen vang ana chi hi. Tamteng ahiman in i pawlpi sunga Pasian nna sephawmpite Mangpa hoina amal amal a sim a gel doh thahtah ding in ikingen uhi. Tunin Amitai tapa Jonah hinkhuo pansan in houlim vai.

- (1) Jonah in Pasian thupieh sanglou: Nikhat Mangpa'n Jonah Amitai tapa kung ah thu a gen a Aman a kung ah Nenevi ah peitan khum khopi lien thupitah taihil in thu vagen tan a sung mipite git loudan keiman thei siem ing achia, tuanah Jonah alelam ah kipan keiman theisiem ing achia, tuanah Jonah a lelam ah kipan in Mangpa apat taimang sawm ta hi. Joppa ah ava haw a khunah Spain zuon ding tembaw khat ana um a khunah tembaw khat ana um a khunah tembaw tuonman ding pie in Spain gam zuon ding in tembaw a toute toh tembaw ah alut ta hi (1:4). Hinanleh zong Mangpa'n huipi hattah langsah a tuachia huilan gimnei taseng in tembaw akise khielta a 1:6 Tembaw bupan ama va mukhie in bang bawl kinei tamna lum na hiei? Thou in len na Pasian kung ah panpi ngai in thu ngen in 1:7. Tambang zauhuoi dinmun a ium uh koipen sukhkhiel a hiei chiin aii a san ua Jonah min a doh khata hi. 1:8. Tamnah bang bawl a um nahiei bang gam a hing kipan nahiei...? Bang Nam na hiei.... ? chin a dong uhi.

- (2) Jonah kisiana: 1:12 Tuipi sung ah hing pai lut un tuachiin khopi hui lan hing theu tava. Keima khelna zieh a khopi hui in noute angla ahi chi ka thei ta a 1:15 khum in Jonah adom ua, tuipi ah a pai ua, tuachiin khopi hui lan tuipi kinong aphapai a, tam thu ah tembaw a touten Mangpa gintat law ua, kithoina silpieh bawl in Ama na sem dingin thu achiem vawt uhi. (1:17). Tualeh Mangpa thupieh bang in Nga lienpi khat in Jonah avalta a, tuachiin ngapi gil sung ah nithum leh zan thum aum hi. Jonah thu ngetna 2:2 ka chimaw laitah in aw Mangpa nangma ka hing hana nang man nahing dawng hi.
- (3) Jonah in Mangpa thupieh zuita: 3:3 Tuazieh in Mangpa thupieh bang in Nenevi ah ava pei a khopi lien mama ahi zieh in a pei in nithum sung a lut hi (3:4) Jonah khopi lien zuon in akipan a nikhat keng lam a zawt zou in thu agen a, Ni sawmli sung in Nenevi kisuse ding ahi (3:5). Tualeh Nenevi khopi lien miten Pasian thupieh khu agingta ua, mipi zousie alienpen apat aneupen tan ann ngawl a khautaang puonsil a kisia ding ahi khu achi chiet uhi (3:5) ah. Tam thu Nenevi Leengpan a zah tahin amangtouna pat in a ding khie a, apuontuol sut in khautaang puon sil in vut lah ah atou ta hi (4:11). Bang teng tung ah khophawhlou naupang tulza leh tul sawmni tualeh ganhing tampi umna khopilien ahi. Tamnah Amitai Tapa Jonah apat zil ding nemp i nei uhi. Pasian apat a taimang a sawm hinanleh Pasian in ahan veve hi. Spain gam zuon a tembaw a atuon lai in Mangpan khopi hui hattah sawl in a tuonna tembawl leh atuongte buoi ta uhi. Hinanleh tembaw tuoh sietlouna dingin a sung a vangih te a jang theina din apai ua a phatuom sih. Tuachiin aii asaan ua Jonah min a doh khata. Jonah tuipi a ang paikhiet chiengun huipi hat leh tui kinong adaita. Pasian in ahanzel a Pasian apat kiphuol zou non lou in Nenevi khopilien tah ah taikawm in thu avagen ta. Nenevi khopi mipite leh a leengpa uh tan in Khautaang puon sil in vut lah ah atou uhi.

- (4) Leengpa thupieh: Agantate tan uh ann leh tui ne a dawn sah lou ding chi ahi. Tamnah igen nuom ahileh tulai igam ah i Upate, Pastor thugente ngai pei nonlou chi bang. Uimaw in loup a ki lohteng abaw chi toh kibang ahi. I Pastorte, i Upate muneu a, moh simmaw thei ahi sih ua, Amauhte Pasion thaunute ahi zaw uhi. Tam bang ichin tou zel leh Amitai Tapa Jonah bang a Hattuumte sunohphah leh khanmaw boh ahi. Jonah thuman louna pen tembaw sunga tuongten a vangsietpi ma bangun nang leh kei thumanlou napen nang leh ken ithuoh ding ahi chi thei vai.
-

THU TUOMTUOM

leh

THUMPI DINGTE



01. Pasion hoina leh mapuina kilam-en kawm in i pawlpi (vaihawmna) Year Planner umsa bang in November 2016 ha sunga NIPOIMAW ineite thumna toh bawzui dingin iki ngen uhi. Tuamai hilou in tami hun leh nite a nuom thei pen leh amanphathei pen a izah theina ding un thumsah vaui.

Nipoimaw i neite:

- 1) Presbytery chin khawmpi: November 11-13, 2016
- 2) Synod Annual Audit: November 07-11, 2016
- 3) Synod kumsim khawmpi: December 08-11, 2016

02. PYF Lentaang District Golden Jubilee - 2016: Mangpa'n kum (50) vingveng meelmu thei dinga apuitungna Ama kunga lungdam thu genna leh Ama thupina piehna toh Golden Jubilee thupi tah leh lawching tah in zang uhi. Lentaang District pen iki khaikhawm na masa leh idinkhietna masa zong ahi. Tam District apata a dangte hing mengkhie ahi uhi. Jubilee thupi: "Khrist palai" chi ahi. (II Korinth 5:20)
03. Manipur Gam Presbytery (60) Diamond Jubilee: Pasian hoina leh mapuina kilam-en kawm in ang tung ding November 11, 2016 ni chieng in ZPCS Campus ah Mangpa'n MGP kum 60 tan meel mu thei dinga ang puitung na Pasian kunga lungdamthu genna, Ama phatna leh thupina piehna i nei ding uhi. I mi lui sangtampiten mupha lou a muol ang liemsan nuo in Mangpa hoina zieh a kipah dan thei in Ama min tawisang din thumkawm in kisa khawl vai. Thupi: Tamtan chieng Mangpan ahing panpi hi (I Samuel 7:12).
04. Zou Synod Calander - 2017 ading Head Office ah muthei in umta. Aleinuomte a ding in Jr. Accountant ah muthei zing ahi.
05. Zou Synod huong sunga Presbytery teng in Khawmpi vaihawmna Minute Copy khat Head Office ah hing submit ding in iki ngen uhi. Ajiehpem Office lam ah etzui ding aum zel zieh in.
06. Kum beikuon a ding ihi toh kiton in i pawlpi etkawlna nuoia Mission School ineite kumtop exam nei ding amauh kem leh enkawltu Sangsyete leh Sangnaupangte adin thu ngetpieh vaui. Tualeh Lamka khopi leh asehvela High School leh College Students exam pe dingte a din thumsah chiet vai ang lawchin theina ding un.
07. Khovel gam zousie a KHANTANHOI phuonzahtu Missionary nna semte adin thumsah vai. Akhente alum avot ngailou bang

aum dingua, a khente damtheina tasam leh agam Government in Pasion thu a doudal na zieha hamsatna tuoh pawl aum ding ua, ama uh te din thuohzawna leh tahpannate nget pieh vaui. Mangpa'n akipiehna uh (Commitment) te tukip thei chiet ding in umpi taken !

08. November hasung a Branches Committee aban ban a peitou dingte ana thumsah vaui. Tuamai hilou in i pawlpi dinkhietna ding a vaihawm siemnate ngetpieh vaui.
09. A 61 veina Manipur Gam Presbytery kumtawp vaihawmna Amun: Central Church. Ahun: 11-13, November 2016 Thupi: "Lampi, thutah leh hinnna" (Johan 14:6).
.....

ZAWNG NAN ULEH HAUSA NA UH E

-Mangkhanpau
V. Bethel

Thumapui = Atung a tahlat a um ithupi uh umzie ahileh tahsa lam a zawng mama hinanleh Hagau lam a hausate leh tahsa lam a hausa mama hinanleh hagau lam a zawng ban ah, HGAU LAM TAHA LAM a a hausatna bukim a ahausate tungtang genchetna zieh a theibuoi lou ding chi ahi.

Chipen = Kingdom Valui Principle Mat 5:3-11na isim leh mihing ngaidan toh akilebul hi. Tuazieh a Lenggam neitu Jesu Khrist hing zilsahdan theikhiel lou ding chi ithupi un a tup pipen ahi. I theisiem zohsemna dingun Gentena in Israelte kung ah

Pasion in "Ahuom, akha, na chi uhi" achi a Ahuom, Akha A pen B chi lou ding or adih pen adih lou chi lou ding china ahi.

1. Paul Zawng nan leh a hausat dan: Zawng nanleh hausatna thupitah toh suh hausat aum ahi etsahna a

Bible bu book giel tampen
achiemte ahi thutuom
hitaleh A zawngna kitheina
ahileh

(a) Philipi 4:11-13 “Tahsap
zieh a tam thu ka gen
ahisih. Tasam tah a umdan
kathei a ka zilta hi”, chia
Philipite kunga agenna
apat a zawngna thei thei in
um hi.

(b) Damasca a Jesu Khrist
toh akimaitua zou apat
(apientha zou chin a)
Gamaliel etkolna hoitah
nei apat Siempu mang hi
dia siempiching a aum
kuon hinanleh Juda sakhuo
a elngat apat azawngna
kipan ahi chi imguollou in
lang hi.

Tu in ahausat dan en va ui:

(a) Mihingte pen shi na
hinanleh Paul in “Shi khu
punna ahi” achi hi.

(b) Mihingten ingaisang mama
uh khovel silte e, i sum leh
pai, pilna siemna nei leh
lam, minthanna, lawchinna
kikhelna, khantouna chite

hinanleh Paul in buathah
kholna (Dusbin) bang a
ngai mawh.

(c) Jail a um khenkhat adia
ki ngaisietna zieh a
mani kithana or kithana
huhamna, gitlouna ahi lai
a Paul adia “Mangpa ah
nuom tawntung un hing
chi kia leuleu vang chia
athu ana gel ahi sih a, ama
diehdieh henkol kibul ahi
lam ah shi ngah a Jail um
pa hinapi kipahtah a lam
lam mawh.

(d) Khrista zieh a gentheina
chimawna, beidotna,
mangbatnate zieh a
hahsatna in apumtuom
hinapi Khrist toh hing
khen gam la ding Leinuoi,
Tuipi, Huikhuo, Vantung
tan a silsiem zousia Khrist
toh khen zou ding umlou
chinalai set.

(e) Gospel tangkoupi thei
nonlou dia vauthai tan a
vau a um a gihthei tan a
gih a aum banah ngahzing
thei tapa ngah zing mai
hilou a vuoh sidupnate

tangkuong sat a satnate, totchilnate banah soisahna sang pen a soisah ahi zou a (Leitung a hing kia non mawngmawng lou ding china) a shi hita, chi ngei a apei zou nuo ua zong thugen toh Gospel tangkou milamdang et lawmtah Hagau mi Sawltah a pei ding na hiei? Nangma ngei a dangtah sang nempi a um e.

- (f) Khrist zieh a gim gentheinate tengteng zong a maituo ngam mai hilou in Khrist zieh a sil bangkim a chom zong khoh sa loupah ahi etsahna a khang mang zong khoh salou a theitawp suo pasal pha vannei hotling Gospel meisel detsiempa khu ahi. Zawng nanleh hausah.

Tam Paul zawng nanleh ahausat dan chi point na theibe ut lai leh II Korinth. 11:23-29 hoi deu in sim in lan Holy Bible page topna Map limte ah Sawltah Paul khuolzinna Maplim hoideu

in en lechin Zawng nan leh a hausat dan imguollou in lang ding hi.

2. Hausa nanleh zawng koite adiei...?

Johan in a mangmuna (Vision) Revelation a bung 2na apat isim leh Hattuum 7 te kung a alaihah na ah Hausa nanleh zawng ahilam kitheilou lungsiet huoi hila kigenthei. Tasam guoh tang aum Hattuum khat um hi koi? (Laodisia Hattuum).

Revelation 3:15 isim leh nanasepte ka thei hi. Lum lah lum lou vot la vot lou a na um sang in na lum leh lum kichien in len, na vot le vot kichien in ahilou leh akam apat etkhiet a um ding ahidan mu ahi banah ama hoi hun toh kisa in kideikhop lai nanleh migenthei hepihuoi tasam mittaw ahidan imguollou in kilang hi.

3:18 apat isim suh leh tahsa lam a hausatna pen sang a

hagau lam a azawna apat
ahausat zoutoh theina ding
a Sana mei a kihal siengset
leh aguohtang zumhuoina
doh lou na din asil ding
puon vam leh na mu theina
ding a na mit a na nu ding
mitna lou lei din Jesun
nasatah in demtoh vau toh
hiltoh thuo hi. Tami thuin
agen ut ahileh abul a igensa
bang a tahsa ah HAUSA
NAN LEH ZAWNNA
KOITE ADIEI? chi dohna
poimaw dawnna dihtah khu
“Laodisia hattuum” chi ahi.

Zou Synod Hattuumte
tungtang Johan in Vision
in mu henlen lai hing thot
ding hileh bang hing chi
thot va na chi ei.? Bang lam
agen naang pen diei..? bang
tan in asau diei? Koi teng in
azada diei? Bang achi giel
in bang achithuoh hah in
bang achi nat tabep diei?

3. Hagau lam tahsa lam a
hausatna bukim a hausa
koi? = Job! Bang chidan
inla? Mi ginum midih tah

Pasian ging silhoi lou lah
apat kihemkhe pa ahina khu
Hagau lam a a Quality ahi.
Thamlou in ginna det in na
lien, ginna a pichingpa ahi.
Tamin hagau lam a ahausat
dan genkia ngainon se lou
a sulang zou hiei hi.

Chipen nichin a innsung maicham
mei mit lou a tawkuong zing um
sun ahileh Job ahi. Thamlou in 1:6
na apat thupi nina 2 tan isim leh
ze etna khatna leh Job tuohsietna:
Pasian phalpieh thuguh huomsung
teng ah Zeetna topkhoh patepna,
topkhoh solna topkhoh mun
ah ding nanleh Pasian hamsiet
keilou a adintheina khu Hagau
lam a ahausatna ahi. Genbelai lei
anei a lam teng asuoh teng leh a
Gou gil atate tengteng nikhat thu
a lah mang a aum mai hilou a a iit
azi nasan setan lam a apang nua
a ittu ding um sun aloi 3 te nasan
in zong khet theitop a azangkhet
ban uah a zii in a Pasian hamsiet
a shi mang thai ta dia thu apieh lai
a zong ham khiel lou leh ta khiel
lou a aum theina khu ahi. Hagau
lam a ahausatna, Amen.

TUN TAHA LAM A HAUSAT DAN EN VAUI

Thei masa dia hoi ahileh Job laibu Bible 66 lah a aupapen ahidungzui a Job period hun lai a mi hausate kitheidan ahileh Gan bang za anei ei? Chi ahia, agan vul khu ahausatna tena ahi

Aganvul zat:

1. Belam Tulsagi (7000)
2. Sangawngsau Talthum (3000)
3. Bawngtal lou kaithei kop (500)
4. Sabiltung zanga (500)
5. Suoh tampi anei nalai a
6. Suolam mite lah a mithupi pen ahi.

Job 42:11 na apat isim suh leh a double a aguolawl ban ah michin in sum neikhat chiet leh Sana khutsip khat chiet a pia uhi. A ganvul teng Rs. 10 man sah mai lei zong lakh 2 leh Singthum 3000 man ahia, tulai sum valuo man a tuot ding hilei Lakh pati Core pati or Milioner minvaw thei mihing ahi. Chi imguollou in kilang hi. Anina “Sudam mite lah a mithupipen ahina ma ahitah mawng hi. Michin in Sana khutsip khat chiet apieh teng pi

toh ituot lai leh vang gen lei tulai a mihausa pen achiemte a um Billioner sate toh bang hi ding hi.

Chipen = Mi thupite tena ahileh alungput angaituona ahatna abawltheina, asiemna, anei, alam leh a dangdang ahi. Tuazieh a zawlou ahileh hi thupi Hagau lam tahsa lam a hausatna bukim a hausapa ahi chi i chiemte na ding ua ahoina ahileh “Innsung maicham a siem zingna” ahi.

Unau iit aw: I thupi un atop silthum, Hausa nanleh azawngte zawng nanleh ahausate Hausatna bukim a hausate tungtang igen zou dungzui in ikoidan (i pomdan) leh sil um dan akibang nai...? Ahilou leh ikoikhiel ei? chite imimal ki dohna ahi banah idonna dih henlen Jesu ang sung a itunchia siem hing tantu hing kipahsahtu leh kumtawn gam a hing suhausatu leh kumtawn gam a GOU khol hing lunglut sahtu hileh chi ka thumna ahi.

Aziehpen = Hagau lam hiin bangbang lam hinanleh ngiemlai mamate ihi chi mit a muthei din umlai hi. Tuazieh a igensa banga

ithupi un a tup sil thumte Zou Synod Contect in genlai vaui.

Hausa nanleh zong LOUDISIA Hattuum igenbang a tulai Hattuum te lah ah pumdim ahi chi imguollou in kilang hi.

Amabou = (Mihausate demna hipumpang lou ahi chi thei masa vai)

Aumzia = Mi hausu hinanleh hagau lam a mittaw saguoh.

Migenthe, tasam ahilam kithei lou a asilpiehte pou Pharisaite bang a kisuonpi mai hilou a kisuonpi loulou ding kisuonpi a dieng lele ban ah Hattuum endih thei mawngmawng lou lailaite ihi chi imguollou in kilang hi.

Bangchidan in la = Hattuum kichi aneitu Jesun a sisan a alei ban ah ama sep ban zawm ding a khovel mite lah apat ang Hattuumte kihinapi bang chi dan amaw khat a enen lailaite ihi.

Tuaziehin i etdan dihloute itopsan lou laisia, hau nanlei izawng ding a izawng banah i zawng touzel

lai ding a Job bang in hausatna bukim in ihausa ngaisih ding chi imguollou in kilang hi.

Bangzahin - Mi Hattuum neitu Jesu Khrist a iit etsahna a Hattuum sung a a SENGAMPEN, A SEMAMPEN, AGENTAWMPEN, AKINGAINGIAMPEN, A PHUNGVUH TAM PEN, AHING SAH PEN, GAA SUONG SAH PEN LEH MAPON, HIMA neilou ding leh a etlawm theipen ding a theitawp a sua zouchia liangvaite bitna dia pan alah ban ua, Missionary lam a siltung a Focus lai ua ei lawi in Hattuum i et dante uh gen ngaise lou a ihinkhuo in puonphou bang a phoudoh ahi chi kitheimawbawl nawnsin aw Unau.

Thuzawna = Tuaziehin na ngaituonate lah ka ngaituonate uh ahi sih a, na umdante uzong ka umdan ahi sih hi. Manga'n achi hi. Aziehpén Vante leitung sang a asan zawh mabang in ka umdante na umdante uh sang in a sang zaw a, tualeh na ngaituonate uh sang in ka ngaituonate a sang zaw hi. Isai 55:8-9

ZPC BENGALURU DIARY

Report tu:

Rev Jonathan Nehlien,

Amasan report pe thei dinga ium ziehin Pasion min I phat uhi. Mangpa hepina leh noute thumna zieh in ZPC Bengaluru in pichin lam manaw zing hi. A tanchin i thei ut ding ziehun tamnah tamlou ka hing tahlang hi.

25th December 2015: Khristmas manna ankuong luina zong um hi. thugenna Biel Pastor Rev Jonathan Nehlien in nei hi.

31st December 2016 Thursday Kumlui 2015 hahna zankim 11.30pm in kinei a, lenkhawmna hun leh kipawllimna hun nuomtahn kizang hi. Pa Soson in kumlui ha'hna neh leh dawn teng abawn in sponsored bawl hi.

1st January 2016 Friday: Kumtha vaiguon kizang in mipi'n ankuong ki iim khawm nainai hi. Tv Paul Hauthang in nehledawn teng sponsored bawl hi. 2015 sunga apenpente, sawma khat petampente, missionary box a thun tampente, hattuom a dinga mi kiphalte leh thu leh la kidemna

a siempente nuomman kipiein hun noptahn kizang hi.

20th March 2016 Sunday: Palm Sunday manna LR Puram biehinn mun ah kizang hi. Nai 10.30am in kikhopna kipan hi. Thugentuin Rev B Chinlamthang kizang hi. Thupi: jesu Jerusalem a thupitaha alutni.

26th March 2016 Friday in Good Friday manna: Thugentuin Rev B Chinlamthang, SAIACS kizang hi. Niengtui leh nehthei in kilawm hi. Nu Lina Lun in a sponsored hi.

27th March 2016 Sunday Easter Sunday manna: Thugentuin Rev Jonathan Nehlien, Biel pastor kizang hi. Tawp in easter annkuong luina kinei hi.

3rd April 2016 Pasianni:

Tunin Bieltu Pastor Rev Jonathan Nehlian leh Upa Dongkhanlal(Synod sawl) makaiin Upa telna(election) secret ballot in kinei hi. Pa Kaiminlun tel ching ahi.

8th May 2016 Missionary

Day manna: Missionary day manna kineiin speaker in Rev B Chinlamthang,SAIACS kizang hi.

15th May 2016 Pentecost Day

manna: Kikhopna 11am in kipan hi. Thugentu bielpastor Rev Jonathan Nehlien kizang hi. Pentecost ankuong ki iim khawm hi.

29th May 2016 Sunday School

Kumkim Laivuonna: Tunin Sunday school half yearly examna biehin ah kineia numei 14 pasal 10 ki exam thei hi.

31st July 2016 Sunday in

Haitha manna kinei hi.

Thugentu bieltu Pastor Rev Joinathan Nehlien kizang hi. singtangmai,tangmai,dawnpawl leh na tang nehkhawmn akinei hi.

28th August 2016 Sunday:

ZPYF day manna um hi. Rev Hangpi in thugenna nei hi.

11th September 2016:

Synod Day manna kinei hi. Puitu Pa Soson. Pantu Nu mangnu. Thugenna Bieltu pastor Rev Jonathan Nehlien.(Synod day pen dt.10th Sept ding ahi hinanleh lemthan louna zieha tunia kimang ahi.)

18th September 2016 Pasianni:

Zou Presbyterian Church Bengaluru akum sagi chinna 7th Anniversary Day vaiguon lawchingtahin kimang hi. Speaker in, Prof. Dr Rini Ralte, President, Northeast Solidarity leh Professor UTC Bangalore in thugenna nei hi. Hattuum tuomtuom:- KWS, PCIR, EBCC leh EOC apat pastor te'n ten greetings hing pie uhi. Hattuum sunga khanglai Gospel artist mi 8 vel in special song present bawl ua, KNP te apat choreography lahna um hi. Vaiguon tawp in Anniversary ankuong iimna kinei hi.

PWF Bangalore ten committee

nei: Bieltu Pastor leh Chairperson Nu Donzahat lamkaiin, tuni

program tawp nuoin ZPC Pastor
quarter ah committee nei uhi.
Agendate ahileh: Anngawl
thumna nei jel ding, antang ham
pat ding chite leh adang dang

genkhawm uh.

Mangpa'n tam sanga hat zaw sem
dingin ZPC Bengaluru hattuom
umpi tou zing ta hen!.

JESU KHRIST HATTUOMTE LUTANG

(I Korin 12:27)

- Rev. Hangpi Manlun

1). Thumapui:

Thuhunlui hunlai in Pasian in Israelte khu tami leitung a nam
tuomtuomte leh mihing zousie lah akipatin bawlding tuom aneiziehin
anateltuom a, tuakhu khawvel pumpi a vahna tuntu ding, mielnuoi a
umte khovah musah dinging leh ama mi-le-sate ahitheina ding un ahi.
Tuakhu Edhah amaw Qahal amaw chiin anaminvaw hi. Ahin amitel
Israelten athupieh azui nuomlou ban uah, amauding a apieh Messia
anuoltah ziehun Pasian program Israelte tung ah a lawsam ta hi.

Tualeh Thuhuntha hunin, hattuom
genna kam teng khu Grik hamin
Ekklesia achi ua, tuami umzie
ahileh, 'hattuom/kipawlkhawmte'
china ahi. I gensa bang ua Israelte
analawsaptah chieng un, Pasian
in Thuhuntha hun in Israelte
thaheng dingin, ei hattuomte
Atapa sisan tungtonin ang siem/
telta hi. (Nasepte 20:28; II Kor.
5:1-9). Pasian leitung pumpi

a silzousie asiemlaiin, A kam a
thu in anasiem a, Ahin hattuomte
ang siemlaiin, Akam a thumai
hilouin Atapa sisan tungtonin ang
nasiem hi.

Tualeh hattuom khu Khrist tahsa
ahiziehin, lukhat maimai anei a
tuakhu Khrsit ahi. Ahin Mangpa
Jesu khu a lutang a neilou a
mihingten Jesu pan mun ding

iluokhah ding uh sil chizat um leh daumtah ahiding hi. Tualeh mihing hina ah jong lullouin kihingtheilouin nna kismtheilou hi. Mihing hoinna leh kilawmna jong ilu uah aum hi. Tuaban ah mihing melhoi leh melsia kitheina jong amai ah ahibou a, adungching in lien in um nan leh jong amai/amel ahoisih leh kingaisanglou hi. Tuabang a hattuumte leh ei Khristianten zong Mangpa Jesu khu lutang leh phawinei chieng un miten Pasian hoina eite tungpan in ang muthei ding hi.

2.). Hattuum khu political Organization ahikoilajang sih hi.

Hattuum khu khawvel gam bang a kipawlkhawmna ahisih hi. Wordly church hilouin Spiritual church ihi uhi. Thugentu khatin, “Hattuum ka en khawvel ka mu a, khawvel ka-en a hattuum kamu hi” achi hi. Agen nuompen khu khawvel leh hattuum akisopoita china ahi. Tembaw/Longpi khu tuitung a taiding a siem ahi a, ahin keh a tui alut leh sawtlou kalin atum mang ding hi. Tuabangin hattuum zong

khawvel a um ahi a, khawvel thu leh vaihawmnaten aluokhah chieng in asie in amangthai thei ding hi Rev. Vanlalngaka in, “Hattuum pen ahiding bang tah aum leh khawvel a movement hatpen ahi” achi hi. Nidanglai in hattuum lamkai khatin a lamkaina khu hagau tellou a kum (7) kapuoh achimai a, hagau panglou a hattuum lamkaite aga uh mu ding atam khol sih hi. Pastor khatma in hagau lam SDO kave chite in hamkam ana jangthei hi. Tamte khu khawvel gam vaihawmna umzie ahi a, hattuum vaihawmna leh hamkam jah ding dan ahisih hi. Tualeh lamkai vaihawm a ipan sawt leh sawtlou apoimaw pen sih napan sung na gasuo nai chi khu apoimaw pen zaw hi. Tuin Jesu lutang a nei leh neilou hattuumte umdan isui ding uhi:

3). Jesu lutang aneite khu Vaihawmna ah ihagau mitna uh isulang zelzel ding uhi.

I theichiet bang un hattuum chin teng in vaihawmna khu ipibawl ua ahoi mama hi. Ahin Pasian panglou a vaihawmna khu agasuo thei tahtah sih hi. Ruth 1:1 ah,

“Tuachin thukhen/ vaihawmten vai ahawm lai un, hichi ahi a, gamsungah kiel ahingtung ta hi” achi hi. Tulai in vaihawmna khu Pasian nnasepna sangpen a ngai hilei akilawmta a, mizousie khu vaihawm kiut in kitha nuom thei mama hi. Ahin Pasian umpina toh vai ihawmsiam leh hagau lam basapna leh kiel leh tah tuntu jong kihilelthei giep hi.

Tualeh committee leh meeting a ipanchieng un lawm-le-guol vai, (groupism) lamkaite mai et leh be-le-phung a vai a, vaihawm lou ding ahi. Tulai a dahuai mama khat ahileh thudihlou theina zenpi a ahuntah a gen ngamlou chite khu duhdahlouna chi khat ahi. Hattuum-le-pawlpi khat in sih-le-tang a ang guot/sawl chieng un, ihattuum dan-le-dun leh hinate igup tinten mai ding uh ahi. Koi e khat mai et a mikhat sakhou (pocket) a i saltanlou ding uh ahi. Tulai Manggam nna isepna uah Pasian lungtang leh deibang etsang in lamkaite maipha et leh muding itup uh hileh akilawmta hi. Tambang a gin um ding a min aguotte ang gin um lou chieng un igam ilei ading

in jong ngiem kiehna chi khat ahi. Tualeh Pasian deina bang e chi ngaitua kawm a adihlou hi a itheite pen hangsan tah igen ngam ding uh ahi. Tambang a lamkaite iding ngamlouna in hattuum vaihawmnate jong khawvel politics vaihawmnate sang in a nieh johna leh gen leh sah ding tampi ang umthei sahthei leng hi.

4). Jesu lutang neite khun kingai ngiemtah in Manggam Nnasepn asem ding uhi.

Manggam nnasepna ah khu i nna uh leh Pasian khu a pawimaw leh lienpen ahiding lai in, ilaw (pay)-te, minphatnate, letna lalnate khu alien thei jaw leng hi. A khen chiengin van gam ah koi alienpen diei? chisang in leitung ah let-le-lal ding kitu in ipumbuai den thei leng uhi. Tualeh gingtu lamkai tamtahte in idin munte uh khu Manggam kehletna ding sang in, mani hamphatna ding, thuneina ding, mite maipha etna ding, eima-le-eima kitoisang na ding, akhente ngel in mite gotna ding a zah isawm jaw thei leng uhi. Adiehin Pasian nnasemte khun tup-le-ngim khat nei a asepin chieng un, atup uh atunlou chieng

un thasietna leh pichinlouna ah apuilut leng hi. Paul in, “Ka nnasep ka ngaisang a, kapahtoi hi’ achi hi. (Rom 11:13-14).

5). Jesu lutang aneite khun Kipumkhatna anei uhi.

Tulai gam chin mun chin a hattuumte lah ah Setan in nna nasatah in asem a, tuakhu hattuumte kipumkhat sah louna ding in ahi. Mangpa Jesu’n “Setan nangawn ama-le-ama akidou leh bang achi khan diei?” achi hi. Tambang deu in ei gingtute lungsim munkhat puo a ium sih leh ikhangsih ding uhi. Thupil in “pankhawm hanta ahi a, kikhen puona ahi” achi hi.. Tuaban ah hattuumte kingahna foundation khu “kilungsiettuona” ahiding ahi.

6 Jesu lutang aneite khu ama uh leh ama uh kimanghil na hinkhuo anei uhi.

I Mangpa Jesun anuajui dingte khu mani kimanghil jen ama juidingte ahithu agen hi. Etsahna ding in world cup amaw, football kipehten abawn un goal khum sawm chiet le uh ahitheisih ding ua, asiemte ngel in ama

minthanna ding taan/sum ngam jen alawmpa apiehchieng un, awlsam tah in alawmpa goal ana khumthei a, tuachin lawchinna atang uhi. Tulai mitam tah te credit tansawm teitei itam jieh un abuaihuoi mama hi. Adiehin tamkhu hattuum lamkaite lah atam nuom mama hi. Minthan utna, bawltthei hi utna, leh midang tung a len sawmnate in hattuum ah chidamlouna tun nuom mama hi.

Baptistpa Johan khu ahunlai in miten Messia hiding in agingta ua, aman keipen Mesia khedap khau suttah jong kahisih achi hi. Tuachin tambang a, Jesu thupina apieh jiehin Jesu amakhu toisang kia in, “Numei suon a pieng lah ah baptistpa Johan athupi pen hi” achi hi.

Tuaban ah Nuajui Mak jong ahun lai in koiman athei tahtah sih ua, ahin gin umtah a Jesu ajui jiehin, Laisiengthou Thuhuntha bunina geltu in apang a, tulai Bible zilte ngel in Thuhuntha lah ah Mak Laibu akigel masapen a, a diehin Khantanhoi budangten Mak gel apat tamtah ala uh chi jong

amukhie uhi. Ahuntah in miten theipha sih leh jong Pasian in anuo in adomsang veve hi. Rev. Dr. (L) Chinzokham in, “Nang hing domsangtu khut khu avang ahi tuajieh in pilvang in ahisieh leh na kiekha ding hi” achi hi.

Tualeh Sadhu Sunder Singh in, “Khros gin umtah a domsang jingte, Khross in jong ama ni khat ni chieng in adomsang ding hi” achi hi. Mangpan simtu zousiete hing guoljawlta hen aw!! Amen.

.....

AGINGTALOUTE MOTNA LEH AGINGTATE PILNA

(Ref. Ps. 14:1-7; Rom. 1:19,20; John 3:19-21; Luke 24:25; Daniel 12:3; Matt. 25:1-13; I Cor. 1:21,24; Ps. 90:12)

- *Rev. Hauzalian
Philipine*

Laisiengthou khu agingtate a dingin pilna laibu ahia, nanleh agingtaloute adingin motna ahi: Pasian mitmu a mipil hiding leh mimo hinading ah deiteelna zalentah ininei uhi. Koiman zawthawbawl in ideiteelna ahing lahpieh theilou ahi. Pasian ngel in zong Ama gintat ding ahiei leh gintalou ding in ahing sawl paupau sih ding ahi. Mizousie masang akhun Pasian in asie-apha, hinna leh shina, Meidil leh Vangam, Khrist leh Setan, Mahni leh Hagau ideipen uh deiteeltheina hing pie hi. Atangpi in eite khu ideiteelna uh hinpiti ihi ua, ithugendan, ingaituona, inasep leh ihinkhuo zahdan u'khu isunglam ua ideiteelna uh hing kilang khie khu ahi.

Nangaituona in natunna ding mun ahing tun ding hi: Mi tampite'n gintatna nei bangin gen ua, nanleh agintatna u'khu nasep ah kilang sah lou uhi. Na gintatna khu nasep a ahing

kilat chiengin tuakhu hundam a um ginna ahi. Hundam a um ginna neimite bou in Mangpa alungdamsah thei uhi. Aziehpén hundamna ginna in mawpaina chinteng apat amaute ahundam

zieh in. Deiteelna bawlkhiel azauhuoidan khu anuachiengin bangma ibawltthei aumnawn sih ding hi. Hinanleh damna toh hinkhuo zangthei nalai a tualeh hunpeisate a ibawlkhielnate apat a theisiemna inei u'leh, Mangpa khu imuongngam ding ua tualeh eite'n Ama venbitna khuthat ah kumtawn in iki kemsah ding uhi. Mipil kichite khu adeiteelna uh Mangpa kunga dongte ahi uhi. Aziehpén amau ua dinga silhoi Mangpa'n atheizieh in.

Gintatlouna ziehin motna chisawm aum a, tuamabangin gingtat ziehin pilna chisawm um hi. Anuoí abangin tahláng va ui:

1. Gintatlouzieh a motna masapen khu, “Pasian katulmaw sih, Pasian kadei sih, Pasian nei sih vang, Ahisihleh kei ading in Pasian aum sih” (Psalm 14:1).
2. Gintatlou zieh a motna anina khu mimal thahatna zang a silbangkim bawlsawmna ahi. Tuakhu mawpuohna zousie eimau

liengkou a ngahsawmna ahi. Tuabang a umna khu eimau tahsa tung tuisa buohna toh kibang ahi. Poimawlou a eimau mimal tunga lungkhamna leh buoina ngahna asuoh ahi. Tambang hamsatnate khu khovel khelna pomang Jesu, Pasian Belamnou kengbul ah inga thei uh ahi (John 1:29).

3. Gintatlouzieh a motna thumna khu Pasian loupina mulou, khovel pasiente'n ahing mittot sahna khu ahi. Pasian gingtaloute khu Setan in amit uh atosah zel ahi. Mittote hamsatna thuohdan khu ngaituo wawi? (2 Cor. 4:4).
4. Gintatlouzieh a motna alina khu Pasian lungdamna huong a lutthei louna khu ahi! (Matt. 25:21)... Israelmite gamdai a akalsuon lai un Gamchiem gam ah aluttheisih uh ahi. Tuakhu agintatlou zieh uh ahi. (Heb. 3:19). Jesu ngei in zong Judia leh

- Galilee ah sil lamdang abawltheilou hun um hi. Tuakhu mipite'n gintatna aneilou zieh uh ahi (Mark 6:5,6).
5. Gintatlouzeih a motna angana khu khelna suoh a panna khu ahi. Aziehpén Bible in khelna bawl pouma khu khelna Suoh ahi chi hi. Gingtalu mite'n "Tapa in ahing suotatsah leh na suohta tahtah ding uhi" chikhu athei sih uhi (John 8:34,36). Khristiante tunga sietna vaihawmna khu ahinkhuo sietna khelna akivaihawmsah leh athuneisahna ahi.
6. Gintatlou zieh a motna aguhna khu dihtatlouna vanzah a panna ahi. Khelna in Khristiante tunga thuneina anei chiengin, abawllou ding sil abawl ta ahi. Tualeh abawlding silte abawl nawn sih ahi. Tuabang mite khu akigellou nading mun a lai kigielkhate bang ahia, tuakhu sil zauhuoi ahi.
- Paul in "Sil ka bawl utpen ka bawl sih a, hinanleh kahuotpen kabawlwaw zel hi... tua silbawlpá khu kei kahi nawn sih a, ka sunga um khelna in abawl ahizaw hi" chi hi (Rom. 7:15).
7. Gintatlouzieh a motna asagina khu Mangpa Jesu toh kizopmatna tan hinkhuo ahi. Mangpa Jesu toh kizopmatna atan chiengin gingtute'n thungetnate, Bible simnate, athuhil leh Sermon bawlte leh apanlahnate ah kipahna aneithei sih ahi. Tamkhun ahundamna amansuo china ahisih a, nanleh hundamna tungtawn a kipahna khu aneitheinawnsih chi ahi. Ama a um Hagau khu amansuo sih a, nanleh Hagau silbawltheina khu aneithei nawnsih ahi. Tuaziehin khelna phuonkhietna khu alampi umsun ahi hi! (I John 1:8-9).
8. Gintatlouzieh a motna

agietna khu hinkhuo a sil mantampen mansuona khu ahi. Tuakhu lungdamna, Pasian thupina a kinepna ahi. Gingtute'n kingaingingiemtah leh akintheilampen a Mangpa toh kizopna tansa khu zopmat tha ding ahi. Tambang kilatna khu Pasian in nuollou ding hi (Ps. 51:17;cf. Isaiah 48:22).

9. Gintatlouzieh a motna akuona khu guollel hinkhuo zahna ahi. Aziehpén Mangpa Jesu khu Pasian Tapa ahi chi gingta bou in khovel,

giloupa leh tahsa sil a zouthei uhi. Khristian nuatolte'n paulap ding ahau ua, aginna uh ahinpi sawm sih uhi (Prov. 5:22,23; 14:14).

10. Gintatlouzieh a motna asawmna khu a sisan zal a hamphatna ngaisahlouna ahi. Gentena'n thumna ngaisahlou, silpieh ineite ngaisahlou, tuate khu Van a um i Pasian uh simmaw na ahi. Khristian gingtu ihizieh un, eite'n hamphatna tampi inei uh ahi. Tuate khu Pasian loupina dingin zang va ui!

AGINGTATE PILNA CHISAWM ZONG GENKIA VA UI

Akhatna ah agingtate'n ahinkhuo uah Pasian Tapa pilna toh thuom a um khu anei uhi. Pilna khu sil poimaw pen ahia, tuaziehin Jesu nei mite'n ahinkhuo uah sil poimaw pen anei uh ahi. Ngaidam in naum ta a, siemtansah leh dopkang in na umta ahi (Prov. 4:7, Matt. 11:19).

Anina ah agingtate'n kipahna

hinkhuo anei uhi. Tuakhu ahinkhuo ua Hagau Siengthou nasep zieh ahi (IPeter 1:8; Rom 15:13).

Athumna ah Pasian in amu bangin ama leh ama zong akimu chienthei hi. Eite mikhiel mangthaisa Pasian hepina poimawte ihidan uh hing musah hi. Mangpa Jesu panpina umlou

in eite khu chimawbeidong ihidan hingmusah hi. Eite bangmalou ihidan uh hing musah a, Jesu khu ihundampa mai hilou in, Ama khu ihinna uh ahia, ihinkhuo ua thahatna hingpetu zong ahi (Acts. 14:39; Matt. 8:8).

Alina ah ahing kipatna uh hingtheisah in, bangzieh a khovel a hing um ihi uoi chi hingtheisah in, izotmun ding u'leh Pasian itna leh hundamna umzie zong hingtheisah hi (Heb. 1:1-3)

Angana ah agingtate'n zalenna dihtah hingpie a, theisiemna dihtah leh kumtawn hinna dihtah hingpie hi. Tualeh lungdamna dihtah, kinepna dihtah zong hing guon hi. Gingu bangin ngaituona hing neisah hi! Silbangkim ah ahoilam ngaituona hing neisah hi (John 17: 3, 17).

Aguhna ah Hagau pieh chiemna inga uhi. Khum Hagau khu pilna Hagau ahia, tualeh hamuonna Hagau zong ahi. Hagau Siengthou khu gingtute ading in hinna hingpie sisan ahi (Acts. 9:31 & 13:52; Gal. 3:14).

Asagina ah dihtatna, suhsiengthouna, siemtansahna leh damna hing neisah hi. Gingtute hinkhuo khu Pasian a um lemna ah ilungtang uh hingven bit pieh in bitna inei uhi (I Cor. 1:30; Isaiah 26:3).

Agietna ah ashitheilou haichi Jesu a inei u'khu inga uhi. Tam khu ashitheilou hinkhuo leh suhsiettheilou hinkhuo khu ahi. Vuimang lou ding haichi khu ahia, suon ding, pahkhietsah ding leh gasuong ding khu ahi (John 12:24)

Akuona ding ah ihinkhuo ua hamsatna, buoina, solna chinteng khu i Mangpa Jesu kunga apkhiet theina khu ahi. Khupdinna hinkhuo zangte khu guolzou in thoukia ding uhi. Tuni'n eite khupdin thei Khristian ihi thei ding uoi? Tamkhu Jesu toh kilbehkhawmna hinkhuo nei utna hinkhuo ahia, tualeh tam ihinkhuo tomnou khat khu Khrist bahna hinkhuo zahsawmna zong ahi (Rom. 8:29; 13:14).

Asawmna ah gingtute khun kipahna thuguh, ihina uh

pomsiem a hintheina hinkhuo hingpie hi. Gentena'n, eite'n genthei tah a umdan zong izil uh ngai hi. Tam khu Paul hinkhuo thuguh ahi. Ama khun Jesu Khrist ah silbangkim a lungkim tah a hindang dan a theisiem ahi (Philippi 4:11,12,13). Amen!

Note: Pasian hepina leh lungsietna toh tam Sermon khu November 10, 14 & 15, 2010 in Churachandpur a Hattuum thum Lutheran Church, Zou Bible Church leh Zou Presbyterian Synod Central Church ah kana gen hi.

Ordain Suunna



UPA KHAMZALAM - 61 TANCHIN TOMKIM

Upa Khamzalam s/o (L) Upa Ginzadong leh (L) Nu Lunnieng te tapa nina ahi, Kum 1955 in Saite vangkho Thanlon Sub-Division ah ana pieng hi. Kum 1957 in Saite khuo apat Tuining khuo ah pemplut uhi. 1973 January ha in Tuining apat Tuimanzang ah hing pemplut uhi. 1979 in azi ittah Nu Nianngaiching d/o Selchinlian tanu khatna toh Tuining Presbyterian Church ah Hattuum dan siengthou in kiteng uhi. 2010 kum in Zoutang Presbytery (ZTP) Session a (3) veina khawmpi thaneina toh Moderator Upa Chinsuonhang khut zang in Ordination pieh ahi. Tuimanzang Hattuum kem leh enkawl ding in Aman tapa - 6 leh Numei -3 anei hi. Tualeh "Tu" pasal-3 leh Numei-9 anei hi. Tualeh pienpi Sanggam pasal-2 leh Numei-3 anei hi. 2013 kum in ZTP Singngat District Chairman in ana pang hi. 2016 January apat sunglam natna hing nei in Imphal ah Doctor mun tuom tuom ah zen leh etkawl ahinuo in October 06, 2016 in a it mama aji, atate leh a Hattuum mite nuasie in zinglam nai khat vel in thupina gam ang na zotsan tahi. Tam i Khristian Tangkou deithaw huoi tah toh i it thu leh i suun thu i puong uhi.

TUNNU LIMBEL PANPINA PETE:

(27th September, 2016 to 21st October, 2016 tan)

1. Nu Gingouniang, Zomi Colony	Rs. 200
2. Nh. Mandeilun Zomi Colony	Rs. 100
3. P. Niangngaiching Zomi Colony	Rs. 300
4. Evan. Goukhogin, Emmanuel	Rs. 100
5. PWF Manniang khuo	Rs. 2,020
6. PWF PN Khovong, Anntang taang	Rs. 500
7. Khupmuanlal, Nungshai	Rs. 200
8. Nh. Sangkim, New Zoveng	Rs. 300
9. Nh. Nianiang, New Zoveng	Rs. 100
10. PWF Sangaikot, Anntang taang	Rs. 850
11. PYF Central District	Rs. 1,162
12. PYF Gunpang District	Rs. 340
13. PWF Central District	Rs. 3,004
14. PWF Suolam District	Rs. 906
15. M. Mangsuanthang, Chingmang khuo	Rs. 1,000
16. Nu Lucy Niangmuankim Chingmang khuo	Rs. 500
17. Nu Lawhching, Chingmang khuo	Rs. 100
18. Nu Niangzaman, Nungshai	Rs. 50
19. Nu Dimkhanvung, Lailamveng	Rs. 200
20. Nu Luaideiching, Lailamveng	Rs. 1000
21. Mrs. Flora Hatnu, UK	Rs. 42,600
22. Nu Vungnou, Thingkangphai	Rs. 1,200
23. Nu Manlunching, Lailamveng	Rs. 500
24. PWF Lamka District	Rs. 1,893

2016 | November | Khristian Tangkou

25. PWF Tuiningkuol District	Rs.	515
26. PWF Central Church Anntang Kg. 126 &	Rs.	1,200
27. PWF Tuining Anntang taang	Rs.	1,500
28. Pu J. Lhungdim IDAS, Delhi	Rs.	5,000
29. Pu Khakhai Zou, Delhi	Rs.	500
30. Pu S.K Mang & Family, Delhi	Rs.	3,000
31. Pu Khupminthang Simte, Delhi NTBC	Rs.	2,000
32. Pu H. Soikhokai Simte, Delhi NTBC	Rs.	2,000
34. Dr. Kamminthang, Delhi (Professor)	Rs.	20,000
35. Pu John Samte, Delhi	Rs.	300
36. Upa Lunminthang, Delhi	Rs.	500
37. Tv. Gideon Suanminlun, Delhi	Rs.	140
38. Nu Enniang, Delhi	Rs.	500
39. Nh. Suanching, Delhi	Rs.	1,800
40. Nh. Manlamching, Delhi	Rs.	50
41. Upa Chinkholian, Manniang khuo	Rs.	500
42. Nu Donkhanniang, Manniang khuo	Rs.	100
43. Nh. Vungngainiang, Manniang khuo	Rs.	100
44. Nu Dimkhokim, Manniang khuo	Rs.	100
45. Tv. Suansianlian, Manniang khuo	Rs.	120
46. Nu Niankhanm,an, Manniang khuo	Rs.	500
47. T. Naomi Goulianching, Manniang khuo	Rs.	500
48. Nu Niangmanvung, Manniang khuo	Rs.	100
49. PWF Mualtam Anntang	Kg.	14
50. PWF Bohlui, Anntang	Kg.	22
51. PWF Daijang Anntang	Kg.	20

-----***-----

Na Tangkou fee a na pe ta in

Undelivered

Please return to:

The Editor

KHRISTIAN TANGKOU
ZPCS Office, Zomi Colony
Churachandpur - 795 128
P.O. Box - 48, Manipur, India
e-mail:zpcs@rediffmail.com/zousynod05@gmail.com

7a,

Edited and Published by the Editor on behalf of the Zou Presbyterian Church Synod